



**EBAZPENA, 2025EKO MAIATZAREN 12KOA, JUSTIZIA ADMINISTRAZIOKO
ZUZENDARIARENA, EUSKAL AUTONOMIA ERKIDEGOKO JUSTIZIA ADMINISTRAZIOAREN
ZERBITZURA DAUDEN FUNTZIONARIOENTZAKO EUSKARA-IKASTAROETARAKO DEIALDIA
EGITEN DUENA**

2025/2026 IKASTURTEA - DEIALDI OROKORRA (Udako barne)

Justizia eta Giza Eskubideen Saileko Justizia Administrazioiko Zuzendaritzak, Euskal Autonomia Erkidegoan lan egiten duten Justizia Administrazioiko funtzionarioen euskarazko hizkuntza-gaitasuna sustatzeko eta bultzatzeko xedez, eta Euskal Autonomia Erkidegoko Justizia Administrazioiko Hizkuntza Normalizazioari buruzko ekainaren 29ko 174/2010 Dekretuan ezarritakoarekin bat etorritik, hizkuntza-gaikuntzako ikastaroak deitu ditu 2025/2026 ikasturterako, 2025eko udako barne.

Horregatik,

EBAZTEN DUT

Artikulu bakarra. – Onartzea Euskal Autonomia Erkidegoko Justizia Administrazioaren zerbitzura dauden funtzionarioei zuzendutako euskara-ikastaroen deialdia, 2025/2026 ikasturterako eta 2025eko udarako, ebazpen honen I. eranskinean jasotako oinarrietan ezarritakoaren arabera.

Vitoria-Gasteiz, sinatzen den egunean.

María Dolores Movilla Rivas
JUSTIZIA ADMINISTRAZIOKO ZUZENDARIA

I. ERANSKINA OINARRIAK

Lehena. – Xedea

Euskal Autonomia Erkidegoko Justizia Administrazioaren zerbitzura diharduten funtzionarioen kidegoetako langileen euskarazko hizkuntza-gaitasuna sustatzea eta bultzatzea.

Bigarrena. – 2025-2026 ikasturterako deialdiak

Justizia Administrazioko Zuzendaritzak honako **bi deialdi** hauek argitaratuko ditu:

- **Deialdi orokorra** (udakoa barne): maiatzean argitaratzen da (hauxe da), eta osorik arautzen du.
- **Deialdi osagarria**: azaroan argitaratzen da, eta ikasturteko bigarren lauhilekorako eskaintza egiten da.

Ikastaroen eskaintza lan-ordutegira zein lanez kanpoko ordutegira hedatzen da.

Autoikaskuntza eta C2 mailetarako deialdi orokorra izango da bakarra, ez da deialdi osagarririk izango.

Hirugarrena. – Deialdi honen hartzaileak

- Deialdi honetan honako langile hauek parte hartu ahal izango dute: Prozesu eta Administrazio Kudeaketakoek, Prozesu eta Administrazio Izapidetzakoek, Laguntza Judizialekoek eta Auzitegi Medikuntzako kidegoetakoek, baldin eta Euskal Autonomia Erkidegoko Justizia Administrazioaren zerbitzuko karrerako funtzionarioak edo bitarteko funtzionarioak badira.

Bitarteko funtzionarioek deialdi honetan parte hartu ahal izango dute, baldin eta izendapenaren iraupena eskatutako euskara-ikastaroaren iraupenaren berdina edo luzeagoa bada.

Era berean, lanaldiaren **laurdenetik gorako murrizketa** duten funtzionarioek lanalditik kanpoko ordutegian bakarrik eskatu ahal izango dituzte euskara-ikastaroak: autoikaskuntza (online) zein euskaltegian (aurrez aurre).

- Prozesu eta Administrazio Izapidetzako Kidegoko eta Laguntza Judizialeko Kidegoko langileei C1 maila lortu arteko baimena emango zaie, lanorduetan zein lanorduetatik kanpo. Salbuespen izango dira euskaltegian C1 maila lortu baina egiaztatu ez dutenak. Azken horiek, gehienez ere, beste bi ikasturte izango dituzte lanorduetatik kanpo euskara ikasten jarraitzeko eta dagokien maila egiaztatzeko. Hortik aurrera ez zaie beste lizentziarik emango.

Era berean, Auzitegiko Medikuen eta Prozesu eta Administrazio Kudeaketaren kidegoetako langileei C2 maila lortu arteko baimena emango zaie, lanorduetan zein lanorduetatik kanpo. Salbuespen izango dira C2 maila (4. HE) lortu baina egiaztatu ez dutenak. Azken horiek, gehienez ere, beste bi ikasturte izango dituzte lanorduetatik kanpo euskara ikasten jarraitzeko eta dagokien maila egiaztatzeko. Hortik aurrera ez zaie beste lizentziarik emango.

Laugarrena. – Eskaera aurkezteko baldintzak

Deialdi honetan parte hartu ahal izango dute Euskal Autonomia Erkidegoko Justizia Administrazioaren zerbitzura diharduten funtzionarioen kidegoetako langileek, baldintza hauek betetzen badituzte:

- **Zerbitzu aktiboan egotea** eskaera egiteko unean baita ikastaroa hasteko unean ere. Ikastaroa hastean, langilea lanerako ezintasun iragankorrean (LEI) badago, ezin izango da euskaltegian matrikulatu. Halakoetan, Deialdi Osagarria argitaratu arte itxaron beharko du izena emateko (azaroa arte). Salbuespen izango dira ezintasun iragankorra kudeatu duen medikuak, txosten bidez, prestakuntza ikastaroak egiteko egokitasuna adierazten duten kasuak. Txosten hori Justizia Administrazioko Zuzendaritzara bidali beharko dute euskaltegi batean matrikulatu aurretik (euskaradeialdiak@euskadi.eus).
- **Eskaera arduradun funtzionalari jakinaraztea edo haren oniritzia izatea** (barnetegia udan), deialdi honetan arautzen denaren arabera (ikusi *Bosgarrena. Eskaerak*).

Bosgarrena. – Eskaerak

Funtzionarioek modulu bat baino gehiago eska ditzakete, eta bakarrik izena eman duten moduluetan aritzeko aukera izango dute. Beraz, eskaera berean udako ikastaroak zein 2 eta 5 orduko ikastaroak eska ditzakete, baina ezin izango dituzte guztiak egin. Hona hemen zehatzago azalduta:

- **Udako ikastaroak:** Ikastaro hauetan onartuak izateko, aurreko ikasturtean (2024-25), HABEk homologatutako euskara-ikastaroren bat egin behar izan dute, eta behar bezalako aprobetxamendua izan.
- **2 eta 5 orduko ikastaroen** artean (biak eskatu badira) 5 ordukoak izango du lehentasuna, eta baldintzak betetzen ez baditu edo baimenik ematen ez bazaio, 2 orduko ikastaroaren aukera aztertuko da.

Eskaerak aurkezteko epea

2025eko maiatzaren 12tik 20ra bitartean aurkeztu beharko dira eskaerak, egun biak barne. Data horretatik aurrera ez da eskabiderik onartuko.

Eskaera-orriak aurkezteko modua

Ikastaroetan parte hartu nahi dutenek "Euskara-ikastaroetarako eskaera-orria" bete beharko dute: **a) ikasturtekoa** (*II. eranskina*) edo/eta **b) udakoa** (*III. eranskina*). Eta, behin dokumentu hori beteta, **posta elektronikoz bidali** beharko dute (**eskatzailearen arduradun funtzionala kopian (CC) jarri**) honako helbide honetara: euskaradeialdiak@euskadi.eus

Argibideetarako telefono-zenbakia: 945019159

Seigarrena. – Eskainitako ikastaroen ezaugarriak

Puntu honetan jasotako baldintzak eta betekizunak onartutako eta baztertutako langileen **behin-behineko zerrendak argitaratu aurretik** bete behar dira. Salbuespen izango dira C1 mailakoak; izan ere, horien kasuan, euskara ikasten jarraitzeko lizentzia buka daiteke.

6.1. Udako ikastaroak

6.1.1. Betekizunak

- Aurreko ikasturtean (2024-25), HABEk homologatutako euskara-ikastaroren batera joan izana, eta behar bezalako aprobetxamendua izatea (ikusi *Hamaseigarrena. Ikastaroen aprobetxamendua*).
- Justizia Administrazioako Zuzendaritzaren bi deialdietatik (Deialdi Orokorra eta Osagarria) kanpoko ikastaroren bat egin dutenek, eskaerarekin batera, euskaltegiaren edo hizkuntza-eskola ofizialaren ziurtagiria aurkeztu beharko dute bertaratzea eta aprobetxamendua egiaztatzeko.

6.1.2. Ikastaroen ezaugarriak

Ikastaro hauen helburua ikasturtean **ikasitakoa finkatzea** da; ez hurrengo maila gainditzea.

Oporraldian zein lanegunetan egin ahal izango dira Udako ikastaroak, urtean Udako ikastaro bakarra egin ahal izango da.

Eskaintzen diren moduluak:

- **Autoikaskuntza ikastaroak (online):** lanorduetatik kanpo egingo dira, eta **gutxienez 70 orduko** iraupena izango dute. Ikastaroa euskaltegiarekin adostuko da, baina **uztailetik irailera bitartean** izango da.
- Udako **egun osoko ikastaro trinkoak:** 2 astekoak izango dira, gehienez ere – euskaltegian nahiz barnetegian–. **Uztailetik irailera bitartean** egin ahal izango dira, eta **gutxienez 80 eskola-ordukoak** izango dira. Langileak ez du ordezkorik izango bere lanpostuan. Horregatik, ikastaroa lanegunetan egin ahal izateko, dagokion **organo edo zerbitzu-arduradunaren oniritzia** beharko du, eta azken horrek eskaera sinatu beharko du.

6.2. Bi orduko ikastaroak (urria – ekaina)

6.2.1. Lanorduetan

Oro har, deialdi honetan, lanorduetan aritzeko ordutegi hau bakarrik onartuko da (ikusi *Hogeigarren oinarria. Ordu-konpentsazioa*):

Aurrez aurrekoak

Goizez:

- 8:00etatik 10:00etara, derrigorrez astelehenetik ostiralera (C2 izan ezik).

Arratsaldez:

- 15:00etatik 17:00etara ala 15:30etik 17:30era, nahi den asteko egunetan.
- 16:00etatik 18:00etara ala 16:30etik 18:30era, nahi den asteko egunetan.

6.2.2. Lanorduetatik kanpo

17:00etatik aurrera hasten diren ikastaroak lanorduetatik kanpoko ikastaroak direla ulertuko da.

6.3. Ikastaro trinkoak – 5h – (urria - otsaila / otsaila - ekaina)

Egunean **aurrez aurre bost irakastordu edo gehiago** irauten duten ikastaroak dira trinkoak. Ikastaro horietara joateak lanaldi osoko lan-liberazioa dakar.

2025/2026 ikasturtean, **gehienez ere, lauhileko liberazio baten iraupena** izango dute ikastaro horiek.

6.3.1. Betekizunak

- Langilearen erreferentziako kidegoari dagokion euskara-maila (egiaztatua ala ez) lortu ez izana.
- Gutxienez A2 maila gainditu izana (egiaztatuta ala ez).
- HABEk homologatutako euskara-ikastaroren batera joan izana 2024/2025 ikasturtean. Ikastaroa gure deialdien barruan (euskaltegietan) zein gure deialditik kanpo (euskaltegian ala hizkuntza-eskola ofizialetan) egindakoa izan daiteke, eta behar bezalako aprobetxamendua izan dela egiaztatu beharko da (egiaztagiria erantsi). (ikusi *Hamaseigarren oinarria. Ikastaroen aprobetxamendua*).
- Aurreko puntukoa bete ezean, euskaltegian mailaketa froga bat egiteko aukera izango du langileak, bost orduko ikastaroan izena emateko nahikoa maila badaukala frogatzeko.

6.3.2. Modalitateak

Bi modalitate eskaintzen dira, eta biak **aurrez aurre**:

- **Euskaltegian** (erregimen irekia), 8:00etatik 14:00etara bitartean.
- **Barnetegian** (barnetegi-erregimena). Zornotzako Barnetegian (Amorebieta-Etxano) edo Maizpide (Lazkao) barnetegian izan daiteke. Egunean 6 eskola-ordu; gainerako denboran jarduera osagarriak egiten dira.

6.4. Autoikaskuntza ikastaroak (online)

Hauxe da deialdi bakarra 2025/2026 ikasturtean autoikaskuntza bidez ikasteko.

Euskaltegietako autoikaskuntza ikastaroak **lanorduetatik kanpo** egingo dira, eta **gutxienez 190 orduko iraupena** izango dute. Ikastaro horietan parte hartzen duten langileek euskara malgutasunez ikasteko aukera izango dute programa informatiko baten bidez, eta tutore baten laguntza izango dute. Aldian-aldean, elkarrizketa-saioak eta aurrez aurreko tutoretza-saioak egingo dira.

Autoikaskuntza bidez ikastea eskatu ahal izango da, baldin eta behar bezala **justifikatzen badira beste ikastaro mota batera joatea eragozten duten salbuespenezko arrazoiak** (lanaldi murrizketak edo arrazoi pertsonalak, hala nola mendekotasuna duen pertsona bat bere ardurapean izatea edo premia bereziak edo zerbitzuaren beharrak izatea, arduradunaren txostena erantsita).

Autoikaskuntzaren ezaugarriak direla eta, nahiz eta denbora tarte batean ikastaroan ibili ez, ikastaroa utzi zen unean berreskuratu ahal izango da, beraz, halakoetan ez da aplikatuko dokumentu honetako honako atal hau: *Hemezortzigarrena. – Ikastaroa behin betiko uztea.*

Zazpigarrena. – Euskara ikasteko lizentzia izango duten langileen konpromisoak

Deialdi honetako euskara-ikastaroetan parte hartzen duten funtzionarioek konpromiso hauek hartzen dituzte:

- Ikastaroetan asistentzia eta aprobetxamendu egokia egitea.
- Mailak gainditzeko deitutako aldizkako ebaluazioak egitea.
- Hizkuntza-eskakizunak edo baliokideak egiaztatzeko azterketak egitea, dagokien mailara iristen direnean.
- Dagokion organo judizialean, euskararen erabilera sustatzeko programetan aktiboki parte hartzea.

Zortzigarrena. – Lehentasun irizpideak

174/2010 Dekretuari jarraituz, Justizia Administrazioako Zuzendaritzak aldiro-aldiro deitzen dituen euskara-ikastaroetara **nortzuk joango diren erabakitzeko lehentasunak** honako hauek izango dira:

1. Dotazio berezia duten eta oraindik beren kidegoari dagokion hizkuntza-eskakizuna egiaztatu ez duten langileak.
2. Lehentasunezko zat jotako organo, zerbitzu edo unitateetako langileak, horiek identifikatzen direnean.
3. Beren kidegoari dagokion hizkuntza-eskakizunetik hurbilen den euskara-maila duten langileak.
4. Euskararen erabilera sustatzeko programetan parte hartzen duten langileak.
5. Euskara-maila bera duten eskatzaileen artean, lehentasuna izango dute destinoko zentroan antzinasun handiena dutenek.
6. Destinoko zentroan euskara-maila eta antzinasun bera duten langileen artean, aurreko ekitaldietan eskainitako ikastaroetan aprobetxamendu onena izan dutenek izango dute lehentasuna.
7. Aipatutako irizpideak nahiko ez badira, langile gazteenak izango du lehentasuna.

Bederatzigarrena. – Ikastaroetara joateko baimenak

174/2010 Dekretuari jarraituz, euskara-ikastaroetara lanorduetan joateko baimen kopurua mugatua izango da. Hortaz, **organo edo zerbitzu bereko plantillaren % 30ek parte hartu ahalko du** ikastaro horietan, nahiz eta Justizia Administrazioako Zuzendaritzak kopuru hori handitzeko ahalmena izango duen.

% 30 hori honela neurtuko da: Kokaleku desberdinetan dauden eta berezitutako zerbitzuak ematen dituzten organo-unitateetan, ehunekoa unitate txiki horietako bakoitzean ezarriko da. Lanorduetako 2 orduko eta 5 orduko moduluetan, ehunekoa bereiz zenbatuko da. Horrez gain, organoaren funtzionamendu ona bermatzeko, kontuan izango da organo judizial berean kidego bereko zenbat langileri ematen zaion baimena.

Hamargarrena. – Mailaketa-probak

Eskaerak aztertu ondoren, honako ikasle hauek egin beharko dute mailaketa-proba:

Probintziako hiriburuetan 8:00-10:00 ordutegia eskatu dutenek, baldin eta deialdi honen aurreko azken 6 hilabeteetan euskara-eskoletara joan ez badira euskarazko ezagutza maila zehazteko.

Mailaketa-proba hauetara deitutako langileak ezinbestean aurkeztu beharko dira. Salbuespen izango dira euskara inoiz ikasi ez dutenak eta A0A0 mailan hasteko daudenak.

Hamaikagarrena. – Taldeen antolaketa

HABE Justizia Administrazioako langileekin aurrez aurreko honako talde hauek antolatzen ahaleginduko da:

- Goizeko **lanorduetako 2 orduko ikastaroak** (8:00-10:00) Bilbon, Donostian edo Gasteizen.
- Ikastaro **trinkoak** (5h) euskaltegian.

Taldea sortzen bada, lantokitik gertu dagoen euskaltegi batean izango da ikastaroa, posible den neurrian. Justizia Administrazioako Zuzendaritzak zein euskaltegitara joan beharko duen jakinaraziko dio interesdunari **iraileko azken astean**; posta elektronikoz lehenengo eta telefonoz gero. Behin taldea esleitu denean, ez da aldaketarik onartuko, ez behintzat behar bezala arrazoitzen ez bada.

Hamabigarrena. – Matrikula-orria

Talderik sortzen ez bada, Justizia Administrazioako Zuzendaritzak **matrikula-orria** bidaliko dio interesdunari posta elektronikoz, eta bere beharretara hobekien egokitzen den euskaltegia bilatu beharko du. HABEk homologatutako edozein euskaltegi aukeratu ahal izango da, publikoa zein pribatua.

Halaber, langileek euskaltegiaren egutegira eta ordutegira moldatu beharko dute.

Komenigarria da matrikula-orria jasotzeko zain daudenak (arratsaldean onartuak izan direnak) lehenbailehen euskaltegia bilatzen saiatzea, plazarik gabe gera ez daitezten. Horrez gain, matrikula-orria euskaltegian aurkeztu beharko dute ikastaroa hasten denerako.

Arrazoiak edozein dela ere, eskatzaileak ez badu matrikula-orria erabiltzen, Justizia Administrazioako Zuzendaritzari itzuli edo jakinarazi beharko dio lehenbailehen.

Hamahirugarrena. – Erreklamazioak

Deialdi honetan onartutakoen eta baztertutakoen behin-behineko zerrenda argitaratzen denean, baztertuak izan direnek 10 egun naturaleko epea izango dute Justizia Administrazioako Zuzendaritzan erreklamazio-idazki bat aurkezteko, argitaratze-dataren hurrengo egunetik zenbatzen hasita. Erreklamazioak helbide honetara bidali beharko dituzte: euskaradeialdiak@euskadi.eus.

Halaber, lanorduetako ikastaroetatik baztertuak izan direnek erreklamazioak egiteko daukaten epe bera izango dute lanorduetatik kanpoko euskara ikastaroa eskatzeko.

Hamalagarrena. – Egutegia

Euskara ikastaroen **egutegi orokorra** honako hau da:

Ikastaroak		
2 ordukoak	5 ordukoak (1. lauhilekoan)	C2 (astean 3 egun)
2025eko urriak 1 – 2026ko ekainak 19	2025eko urriak 1 – 2026ko otsailak 13	2025eko urriak 1 – 2026ko ekainak 19

5 orduko ikastaroetan, euskaltegiak erabakitako egutegia jarraitu beharko dute nahitaez. Ikasleak lan egiten duen organoan jaieguna bada, euskaltegira joan beharko du. Aldiz, euskaltegian jai bada edo beste arrazoiren batengatik eskolarik ez badago, ikasleak lantokira joan beharko du, egun bakar baterako bada ere, salbu eta oporrak edo baimen eguna eskatu badu egun horretarako.

Baldin eta, **2 orduko modulua** edo antzekoa egitea onartuta duten langileen kasuan, euskaltegiko eskola-orduekin, osorik edo zati batean, bat datorren ezinbesteko denborako lizentzia edo baimena sorrarazten duen gertakariren bat gertatzen bada, langileak egun horretan bere lanpostura joan beharko du, eta lizentziak edo baimenak estaltzen ez duen denbora egin beharko du, esleituta duen lanaldi arruntera iritsi arte.

Hamabosgarrena. – Ikastaroetara ez joatearen justifikazioa

Ondorio guztietarako, ikastaroa ematen den **ikastetxea lantokitza**t hartuko da.

Ondorioz, lanorduetan dabilzan ikasleek **bertaratze- eta puntualtasun-hutsegite guztiak justifikatu** beharko dizkiote organo judizial edo zerbitzuko arduradunari, lanean beste edozein hutsegiterekin egiten den bezala. Hutsegite horiek Justizia Administrazioako Zuzendaritzari jakinarazi beharko dizkio: euskaradeialdiak@euskadi.eus.

Ez dira bertaratze-hutsegite gisa zenbatuko honako hauek:

- guardia presentzialak (osorik egin beharko dira; prestasun-guardietan, berriz, euskaltegira joan ahal izango da),
- ezintasun iragankorrak,
- mediku-kontsultak,
- amatasun edo aitatasun baimenak,
- bularra emateko baimena,
- senitartekoei medikuarenera laguntzeko baimena,
- senitartekoen ospitaleratzea,
- senitartekoen heriotza, eta
- unean uneko zerbitzuaren beharrak.

Oro har, ez dira hutsegitetzat hartuko lana eta familia bateragarri egiteko baimenak, ordu batzuetan edo egun batean lanera huts egitea ahalbidetzen duten baimenak bezala.

Dena den, horiek ere Justizia Administrazioako Zuzendaritzako Euskara Zerbitzuari justifikatu beharko zaizkio: euskaradeialdiak@euskadi.eus.

Liberatutako ikasleek bertaratze- eta puntualtasun-hutsegite guztiak jakinarazi beharko dizkiote Justizia Administrazioako Zuzendaritzari: euskaradeialdiak@euskadi.eus.

Hamaseigarrena. – Ikastaroen aprobetxamendua

Aprobetxamenduari dagokionez, deialdi bakoitzean honako hauek hartuko dira kontuan: aurreko ikasturteko datuak eta ikasle bakoitzaren ikasketa-ibilbidea. Datu horietan oinarrituta, ikasketa-prozesuaren garapenean etenik ikusten bada (adibidez, 2 ikasturte maila berean ebaluaziorik gainditu gabe), Justizia Administrazioako Euskara Zerbitzuak erabaki dezake eskaeran eskatutakoa ez onartzea.

Ondorioz, euskaltegi batean euskara ikasteko eskaerak **aldatu edo ezetsi ahal izango dira aprobetxamendu horren arabera**. Kasu bakoitzaren arabera, baloratuko da euskaltegira lan-ordutegitik kanpo joateko aukera ematea edo eskaintzea euskara zerbitzuak dituen online moduluetakoa bat, zeinak euskara ikasteko prozesuaren dinamikari bultzada emateko sortu baitziren.

Horren harira, deialdi honetan **aprobetxamendua eta ebaluazioa EZ dira egokiak izango**:

- **2 orduko ikastaroetan**, aurreko ikasturteko asistentzia emandako ordu teorikoen % 80 baino baxuagoa bada –baita autoikaskuntzan ere, informatika programa eta mintza-saioak kontuan hartuta–.
- **5 orduko ikastaroetan**, aurreko ikasturteko asistentzia emandako ordu teorikoen % 90 baino baxuagoa bada.

Ebaluazioan honako baldintza hauek bete beharko dira **egokia** izan dadin:

- Ebaluazio bakarreko ikasturtean, ebaluazio hori gainditzea.
- 2 ebaluazioko ikasturtean, bietako bat gutxienez gainditzea.
- 3 ebaluazioko ikasturtean, gutxienez 2 ebaluazio gainditzea.

Hamazazpigarrena. – Ikastaroan berandu hastea

Didaktika eta antolakuntza arrazoiak direla medio, ikasleak ikasturteko lehen egunean hasi beharko du klasean. Aparteko kasuetan, behar bezala justifikatuta (medikuaren baja, amatasun-baja, adopzioa edo antzeko lizentziak), ikasturtean beranduago hastea onartuko da. Hona hemen **gehienez ere** zenbat egun beranduago has daitezkeen: **5 eskola-egun liberazio osoko ikastaroetan** (5 ordukoak eta barnetegiak) eta **10 eskola-egun gainerako ikastaroetan**.

Hona hemen berandu hasi ahal izateko baimena lortzeko prozedura:

- a) Ikasleak aldeztu aurretik jakinarazi beharko dio Justizia Administrazioako Zuzendaritzari (Euskara Zerbitzuari) ez dela ikasturte hasieran eskolan hasiko aurretik aipatutako arrazoiren bat tarteko.
- b) Ikaslea eskolan hasteko moduan dagoenean, bere eskolatzearen berri eman beharko dio Justizia Administrazioako Zuzendaritzari (Euskara Zerbitzuari).

Ondorioz, adierazitako epeak igarotakoan, baja emango zaie eskoletara hasi ez diren langileen eskaerei.

Hemezortzigarrena. – Ikastaroa behin betiko uztea

Ikastaroa hasi ondoren, ikasleak ikastaroa behin betiko utzi nahi badu, 10 egun naturaleko epea izango du Justizia Administrazioako Zuzendaritzari (euskaradeialdiak@euskadi.eus) jakinarazteko. Horretarako honako agiri hau bete beharko du: *“Jakinarazpena: Euskara-ikastaroak uztea” (IV eranskina)*.

Aurreko ikasturtean, behar bezala arrazoitu gabe (Zuzendaritza honen iritziz) 2 edo 5 orduko euskara-ikastaroa utzi dutenek ezin izango dute lanorduetako ikastaroetan parte hartu; eta lanorduz kanpoko ikastaroetan parte hartzeko aukera baino ez dute izango.

Bestalde, hurrengo ikasturterako **eskaera ukatzeko arrazoi** izango dira honako hauek: ez jakinaraztea ikastaroa ez dela egingo edota utzi egingo dela edo ezarritako epea amaitu ondoren jakinaraztea.

Hemeretzigarrena. – Lantokia aldatzea

Ikastaroa egiten ari dela langilearen kargu-uztea gertatzen bada, Justizia Administrazioako Zuzendaritzari jakinarazi beharko dio (euskaradeialdiak@euskadi.eus), eta lanean ez dagoen bitartean baimendutako ikastaroa egiten jarraitu ahal izango du. Baina, Justizia Administrazioan berriro lanean hasten bada, Justizia Administrazioako Euskara Zerbitzuari jakinarazi beharko dio; izan ere, euskara ikasteko baimena berriro aztertu beharko da, ikastaroa, egoera berria eta deialdiko irizpideak kontuan hartuta.

Lekualdatze, zerbitzu-eginkizun edo ordezkapen bertikalen kasuan, langileak ezin izango du destino berrian dagokion ikastaroan hasi, harik eta Justizia Administrazioako Zuzendaritzak (Euskara Zerbitzuak) ikastaroa onartu eta jakinarazi arte.

Hogeigarrena. – Orduen konpentsazioa

7:30etik 17:00etara artekoak hartuko dira lanordutzat. Ildo horretan, eguneroko benetako lanaldia bete behar da, Euskal Autonomia Erkidegoko Justizia Administrazioari Funtzionarioak Euskal Administrazio Orokorreko Funtzionarioekin nola parekatu arautzen duen akordioaren 30. artikuluan ezartzen diren irizpideen arabera.

- Ikastaroetara goizez joaten diren funtzionarioek **8:00etan hasiko dute lanaldia euskaltegian** bertan, eta ez zaie onartuko lantokian 7:30ean fitxatzea. Ordu-kontrolako aplikazioan txertatuko da dagokion prestakuntza lizentzia. Horrez gain, langileek eskolak amaitzean, gehienez ere, 20 minutu izango dituzte euskaltegitik lantokira joateko (10:20ak arte gehienez).
- Arratsaldeko 15:00ak eta 17:00ak artean hasten diren ikastaroak lanorduetakoak dira, beraz, ordu-kontrola egiteko aplikazioan dagokion prestakuntza lizentzia txertatuko da. Arratsaldeko eskola egunak, euskaltegiek eskaintako eskaintzari jarraituta, onartutako pertsonak nahi dituen egunetan izango dira. Hortaz, lizentzia, euskaltegira joan behar duen egunetan soilik txertatuko da. Lizentzia horrek **8:30ean sartzea eta 14:00etan irtetzea baimenduko du**. Ondorioz, lanaldiaren 5 ordu eta erdi bulegoan egingo dira, eta gainerako 2 orduak euskaltegian.
- Ikastaroetara lanorduz kanpo doazenek (17:00etatik aurrera) **ordu-konpentsazioa** izango dute, baldin eta honako baldintza hauek betetzen badituzte:
 - Ikastaroak, gutxienez, astean 8 eskola-orduak izango dira, eta HABEk homologatutako euskaltegietan egin beharko dira.
 - Gutxienezko asistentzia bete beharko da (ikus *Hamaseigarrena. Ikastaroen aprobetxamendua*).
 - Konpentsazioa 5 egunekoa izango da ikasturte osoko ikastaroetan, eta 2 egunekoa lauhileko bakarreko ikastaroetan. Konpentsazioa ofizioz izapidetuko da, eta uztailearen bukaeratik aurrera eskatu ahal izango da.

Hogeita batgarrena. – Ikastaroen finantzaketa

- **Euskaltegia:** Lanorduetan zein lanorduz kanpo euskaltegira joaten direnek ordainduta izango dute ikastaroaren matrikula-gastua. Hortaz, euskaltegian ez dute ezer ordainduko.

- **Barnetegia:** Justizia Administrazioko Zuzendaritzak bere gain hartuko ditu barnetegiko matrikula- eta egonaldi-gastuak.
- **Autoikaskuntza ikastaroak:** Justizia Administrazioko Zuzendaritzak kostuaren % 70 ordainduko du, eta % 30 ikasleak berak ordaindu beharko du matrikula egitean. Hala ere, ikasturte amaieran aprobetxamendua ona izan bada, itzuli egingo zaio ordaindutako dirua. Horretarako, interesdunak eskaria aurkeztu beharko du Justizia Administrazioko Zuzendaritzan (Euskara Zerbitzua) ikastaroa amaitu eta hiru hilabeteko epean. Eskariarekin batera, ordainagiria bidali beharko du honako helbide honetara: euskaradeialdiak@euskadi.eus.

Ez dira ordainduko honako gastu hauek: joan-etorriak, material didaktikoa eta abar.

II. ERANSKINA

Euskara-ikastaroetarako eskaera-orria. **Deialdi orokorra 2025/2026**

III. ERANSKINA

Euskara-ikastaroetarako eskaera-orria. **Uda 2025/2026**

IV. ERANSKINA

Jakinarazpena: Euskara-ikastaroa uztea. **Ikasturtea 2025/26**